

Ո Ր Ո Շ ՈՒ Մ

Ճանապարհային ոստիկանության վարչական իրավախախտման վերաբերյալ գործով
20.04.2021թ. կայացված ԱՖ642096 որոշումն անփոփոխ, իսկ վարչական բողոքն առանց
բավարարման թողնելու մասին

<<30>> 04 2021թ. 7-13- 704

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Կարեն Մինասյանի ՄԴ/33413-21 դիմումի քննարկման արդյունքում ստեղծված
նյութերը՝

Պ Ա Ր Զ Ե Ց Ի

Երևան քաղաքի Շիրազի փողոցի 28 շենքի 3 բնակարանի բնակիչ Կարեն Մինասյանը
դիմումով խնդրել է բեկանել Ճանապարհային ոստիկանության վարչական իրավախախտման
վերաբերյալ գործով 20.04.2021թ. կայացված ԱՖ642096 որոշումը՝ նշելով, որ կատարել է
շրջադարձ, որտեղ բացակայել են գծանշումները: Դիմումին կից ներկայացրել է տեսանյութ:
Միաժամանակ հեռախոսակապի միջոցով պնդել է դիմումում նշված հանգամանքները:

Դիմումի քննարկման արդյունքում պարզվել է, որ վարչական իրավախախտման
վերաբերյալ գործով 20.04.2021թ. կայացված ԱՖ642096 որոշումը ենթակա է կատարման
հետևյալ պատճառաբանությամբ.

<< կառավարության <<Հայաստանի Հանրապետության ճանապարհային երթևեկության
կանոնները և տրանսպորտային միջոցների շահագործումն արգելող անսարքությունների ու
պայմանների ցանկը հաստատելու մասին>> 28.06.2007թ. թիվ 955-Ն որոշման հորիզոնական
գծանշումներ բաժնի 1.1՝ Հոծ գիծ գծանշումը բաժանում է հանդիպակաց ուղղությունների
տրանսպորտային հոսքերը (առանցքային գիծ), նշում ճանապարհի վտանգավոր վայրերում
երթևեկության գոտիների սահմանները և ցույց տալիս երթևեկելի մասի սահմանները, որ
մուտքն արգելված է, ցույց է տալիս տրանսպորտային միջոցների կայանման տեղերի
սահմանները, իսկ 1.3 հանդիպակաց (հակադիր) հոսքերն իրարից բաժանող գծանշումը չորս և
ավելի երթևեկության գոտի ունեցող ճանապարհներին բաժանում է հանդիպակաց
ուղղությունների տրանսպորտային հոսքերը (առանցքային գծեր):

Վարչական իրավախախտումների վերաբերյալ ՀՀ օրենսգրքի 124-րդ հոդվածի 2-րդ մասի
համաձայն՝ տրանսպորտային միջոցների երթևեկության հակադիր հոսքերն իրարից բաժանող
գծանշումների պահանջները չկատարելը առաջացնում է տուգանքի նշանակում՝ սահմանված
նվազագույն աշխատավարձի տասնապատիկի չափով:

Ուսումնասիրությամբ պարզվել է, որ 20.04.2021թ. ժամը 14:05-ի սահմաններում Երևան
քաղաքի Հասրաթյան փողոցում քաղաքացի Կարեն Մինասյանի վարած <<TOYOTA>>
մակնիշի 36TV419 հաշվառման համարանիշի ավտոմոբիլը կանգնեցվել է Ճանապարհային
ոստիկանության ուղեկցող սպայական վաշտի 2-րդ սպայական դասակի ավագ տեսուչ,
ոստիկանության փոխգնդապետ Ա.Ղազարյանի և 1-ին սպայական դասակի տեսուչ
ոստիկանության կապիտան Ա.Գրիգորյանի կողմից՝ ճանապարհային երթևեկության կանոնի
խախտման համար, այն է՝ վարորդը ավտոմոբիլը վարելիս հատելով 1.3 հանդիպակաց
(հակադիր) հոսքերն իրարից բաժանող գծանշումը կատարել է հետադարձ: Վարորդի
նկատմամբ կազմվել է վարչական իրավախախտման վերաբերյալ արձանագրություն և
Վարչական իրավախախտումների վերաբերյալ ՀՀ օրենսգրքի 124-րդ հոդվածի 2-րդ մասի
համաձայն կայացվել է ԱՖ642096 որոշումը:


Ճանապարհային ոստիկանության ծառայողների կողմից տրված գրավոր բացատրությունների համաձայն՝ քաղաքացի Կարեն Մինասյանի կողմից կատարված իրավախախտումը հիմնավորող՝ տեխնիկական միջոցների կիրառմամբ ձեռք բերված ապացույցներ առկա չեն, սակայն իրավախախտումն եղել է անմիջապես իրենց տեսադաշտում, ակնհայտ և պարզ տեսանելի, ինչի կապակցությամբ կազմվել է համապատասխան արձանագրություն և կայացվել ԱՖ642096 որոշումը: Հայտնել են նաև, որ շրջադարձը կատարվել է ոչ թե դիմումատուի կողմից ներկայացված տեսանյութում առկա հատվածից, այլ մի փոքր ներքևի հատվածից, որտեղ հստակ երևում են 1.3 հանդիպակաց (հակադիր) հոսքերն իրարից բաժանող գծանշումները: Միաժամանակ ոստիկանության ծառայողները հայտնել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

<<Ճանապարհային երթևեկության անվտանգության ապահովման մասին>> օրենքի 17-րդ հոդվածի 1-ին մասի <<ա>> կետի համաձայն՝ Ճանապարհային ոստիկանության ծառայողը պարտավոր է տրանսպորտային միջոցը կանգնեցնել, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջանում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 124-րդ հոդվածի 2-րդ մասի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 20.04.2021թ. կայացված ԱՖ642096 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Կարեն Մինասյանին և Ճանապարհային ոստիկանության ուղեկցող սպայական վաշտ:



Ե. Կարապետյան